

09-07-2025

- भारत ते नामीबिया नै डैलीगेशन स्तर दी गल्लबात दे दौरान केई महत्वै आहले क्षेत्रें च सहयोग दी तपाश कीती ऐ।
- गृह मंत्री होरें आखेआ जे गुजरात ते राजस्थान च दोआइयें च इस्तेमाल आस्ते उंट दा दुध बरतेआ जाहग।
- भारती वायु सेना दा जगुआर प्रशिक्षण जहाज चुरू च दुर्घटना दा शिकार होई गेआ ऐ। मामले च कोर्ट ऑफ इन्क्वायरी दे हुकम जारी कीते गे न।
- वैश्विक आतंकवादी निगरानी संस्था-FTF दा आखना ऐ जे पुलवामा हमले आस्तै विस्फोटक पदार्थ ऑनलाइन खरीदारी प्लेटफार्म थमां खरीदे गे न।
- गुणवत्ता दे बडोदरा च पुल ऐई पौने करी 9 लोकें दी मौत ते कई घायल होई गे न। गुजरात दे मुख्यमंत्री होरें घटना दी जांच दे आदेश दित्ते न।
- भारती मौसम विभाग नै छत्तीसगढ़ ते मध्य प्रदेश च बरखा आस्तै रेड अलर्ट जारी कीता ऐ।

<><><><><><>

### EVE-PM Namibia-Visit

प्रधानमंत्री नरेंद्र मोदी होरें अज्ज राजधानी विंडहोर च मौजूद स्टेट हाउस च नामीबिया दे राष्ट्रपति नेटुम्बो नंदी नदेलवा हुंदे कन्नै डैलीगेशन स्तर दी गल्लबात कीती। इस गल्लबात दा उद्देश्य महत्वै आहले क्षेत्रें दी खोज करियै दोन देशें बश्कार आर्थिक सांझेदारी गी होर मजबूत करना ऐ। स्वास्थ्य ते चिकित्सा, वैश्विक जैव ईंधन, बुनियादी ढांचे ते उद्यम आहले क्षेत्रें च समझौते पर दस्तखत कीते गे। जात्तरा दे दौरान प्रधानमंत्री होरें नामीबिया दे संस्थापक ते पैहले राष्ट्रपति डॉ. सैम नुसोमा होरें गी श्रद्धांजलि भेंट कीती।

<><><><><><>

### India-Brazil

इस थमां पैहले कल ब्रासीलिया च प्रधानमंत्री होरें ब्राजील दे राष्ट्रपति लुईज इनासियो लूला हुंदे कन्नै गल्लबात कीती। मगरा इक सांझे पत्रकार सम्मेलन च प्रधानमंत्री नरेंद्र मोदी होरें आखेआ जे भारत ते ब्राजील अगले 5 बरें तगर दपक्खिया बपार गी 20 बिलियन डालर तगर लेई जाने आस्तै सहमति होई गे न। प्रधानमंत्री होरें आखेआ जे दमें धड़े भारत-मर्कोसर बपार समझौते च विस्तार आस्तै बी सहमत होई गे न।

<><><><><><>

### Russia-Ukraine Attacks

यूक्रेन नै अज्ज आखेआ ऐ जे जंदी राती रूस नै मुल्लखै दे पच्छमी हिस्सें च कोई साड्डे 700 ड्रोन ते मिसाइलें कन्नै हमला कीता ऐ। यूक्रेन दी ब्हाई फौज नै दावा कीता ऐ जे इन्डे चा 711 ड्रोन्स ते मिसाइलें गी असें नकारा करियै हेठ सुट्टी दित्ता ऐ। उनें दस्सेआ जे एह हमले यूक्रेन दे पच्छमी वोलीन

इलाके गी नशाना बनाइयै कीते गे न जेदी राजधानी तुस्सक कन्नै पोलैंड ते बेलारूस लगदे ना। रूस आसेआ इन्ने बड्डे पैमाने पर हमले उस्सलै कीते गे न जिसलै अमरीका नै यूक्रेन गी ब्हाइर रक्षा प्रणाली आहले थेआरें दी सप्लाई रोकने दे अपने फैसले गी वापस लैने दी घोषणा कीती ऐ।

<><><><><><>

### ED-Searches

प्रवर्तन निदेशालय ई.डी. इस बरे फरवरी च अमरीका थमां कड्डे गेदे गैर कनूनी प्रभासियें सरबंधी डोंकी रूट मामले च अमृतसर, संगरूर, पटियाला, मोगा, अम्बाला, कुरूक्षेत्र ते करनाल च 11 थाहरें पर छापेमारी करा'रदा ऐ। इस मामले दी जांच पंजाब ते हरियाणा दे पुलिस अधिकारियें आसेआ अमरीका जाने दे इच्छुक लोकें कन्नै होए दे धोखाधड़ी करने आहले ट्रेवल ते बीजा एजेंट ते बिचौलियें दे खलाफ दर्ज 17एं एफ.आई.आर. दे आधार पर शुरू कीती गई ऐ।

<><><><><><>

### CAQM

वायु गुणवत्ता प्रबंधन आयोग नै परानी गड्डिएं गी ईंधन नेई देने सरबंधी अपने पैहले दे निर्देश च संशोधन कीता ऐ। आयोग नै आखेआ ऐ जे दिल्ली, गुरुग्राम, फरीदाबाद, गाजियाबाद, गौतमबुद्ध नगर ते सोनीपत च इस बरे पैहली नवंबर थवां परानी गड्डिएं गी ईंधन नेई थ्होग। एह प्रतिबंध अगले बरे पैहली अप्रैल थवां राश्ट्री राजधानी क्षेत्र दे बाकी जिलें च बी लागू होई जाग।

<><><><><><>

### HM-Cooperatives

अंतरराश्ट्री सहकारिता बरे दे मौके पर गृह मंत्री अमित शाह होरें गुजरात, मध्य प्रदेश ते राजस्थान च सहकारिता कन्नै जुडी दी महिलाएं ते कार्यकर्ताएं कन्नै गल्लबात कीती। श्री शाह हेरें कच्छ जिले च मौजूद उंट पालन मालदारी सहकारिता सोसायटी दी मिरलबेन राबड़ी कन्नै गल्लबात कीती। गल्लबात दौरान मिरलबेन होरें आग्रह कीता जे उंट दे दुध दा टैस्ट ते शोध कीता जा जेदे पर श्री शाह होरें आखेआ जे चार आयुर्वेदिक कंपनियां उंट दे दुध दे सेहत सरबंधी गुणें गी जांचने आस्तै टैस्ट करा दियां ना।

<><><><><><>

### Aircrafts-Crash

भारती ब्हाई फौज दा इक जैगुआर फाइटर ज्हाज अज्ज राजस्थान दे चुरू जिले कश हादसे दा शिकार होई गेआ। हादसे दे तुरत मगरा पुलिस ते प्रशासनिक टीमां हादसे आहली थाहरै पर पुज्जी गेइयां। चुरू दे पुलिस सुप्रिंटेंडेंट नै जानकारी दिती ऐ जे हादसे आहली थाहरै दा दऊं शव बरामद कीते गे ना।

<><><><><><>

### FATF-Terror

आतंकवाद लेई रपेआ पैहा मुहैया करोआने आहलें पर तक्क रखने ते माली कारवाइएं सरबन्धी कार्य बल FATF नै आखेआ ऐ जे भारत च आतंकवादी हमले आस्तै लोडचदे समेयान दी खरीद च ई-कामर्स प्लेटफार्म दा इस्तेमाल कीता गेआ। जम्मू-कश्मीर दे पुलवामा ते उत्तर प्रदेश दे गोरखनाथ मंदर च होए दे आतंकवादी हमलें दे सिलसिले च एह गल्ल सामने आई। FATF नै अपनी इक रिपोर्ट च आतंकावदिएं गी रपेआ-पैहा मुहैया करोआने आस्तै सोशल मीडिया, मेसेजिंग ऐप ते Crowdfunding sites दे इस्तेमाल बारै सौहगा कीता हा। प्रतक्ख माली सहायता सिखलाई जां सरबन्धी समेयान दे प्रावधान सने होर दुई नेकां चाल्ली दी मदद आतंकवाद लेई दित्ती जा रदी ऐ। FATF नै हाल च होए दे आतंकवादी हमले दी निंदा कीती ते आखेआ जे इयै नेहू आतंकवादी हमलें बगैर माली मदद मुमकिन नेई हैन।

<><><><><><>

### Puduchery-Strike

ट्रेड युनियन आसेआ सांझे तौरा पर कीती गेदी राश्ट्रव्यापी हड़ताल करी अज्ज पुदुचेरी च आम जन जीवन प्रभावित होआ। आटो, टेंपो ते बसें सने प्राइवेट परिवहन सेवां बंद रेइयां। सरकारी बसें गी पुलस सुरक्षा हेठ चलाया गेआ। दुकानां, बपारिक संस्थान, सब्जी ते मच्छी मंडिया बंद रेइयां। केई प्राइवेट स्कूलें अज्ज छुट्टी दी घोषणा कीती दी ही।

<><><><><><>

### Amarnath-Yatra

श्री अमरनाथ जी दी सलाना जात्तरा पहलगाम ते बालटाल दौनें रस्ते राएं सुचारू ढंगे सिर जारी ऐ। मुख्य भरै दे अलावा बाहरले मुखें थवां बी लोक इस जात्तरा लेई आवा रदे न। दपैहरी तगर 1 लक्ख 21 जहार श्रद्धालुएं पवित्र गुफा च मत्था टेकी लैते दा हा। इस जात्तरा लेई अजे तगर 4 लक्ख थवां बहू लोकें अपना पंजीकरण करोआए दा ऐ।

तोआई, जम्मू दे भगवती नगर आहले आधार शिविर थवां 7 जहार 579 श्रद्धालुएं दा जत्था 302 गड्डिं दे काफले च सोआर होइयै घाटी लेई रवाना होआ।

<><><><><><>

### Amarnath-Langer

चला'रदी सलाना श्री अमरनाथ जी दी जात्तरा दे मद्देनजर खाद्य सुरक्षा सरबन्धी मैहकमें आसेआ जांच गी होर बी तेज ते व्यापक बनाया गेआ ऐ तां जे श्रद्धालुएं गी म्यारी ते साफ-सुथरा खाना उपलब्ध होई सकै। खाद्य सुरक्षा सरबन्धी अधिकारी बलबीर सिंह होरें बनिहाल च लंगर आहली इक थाहर दा दौरा लाया। उनें उत्थे कीते गेदे इंतजामें पर संदोख जाहिर कीता। उनें लंगर लाने आहलें गी आखेआ जे ओहू अपना पंजीकरण खाद्य सुरक्षा ते मानक सरबन्धी कनून तैहत करन ते सारे नियम कायदे दा

पालन करना। रामबन जिले च तौले गै मोबाइल फूड टेस्टिंग वैन शुरू होग ते ओहू खाने-पीने आहली चीजें दी जांच करोग।

<><><><><><>

### CM -JKTDC

जम्मू-कश्मीर च सैलसफा गी मजबूत करने आहली भेठा इक गैंऽ तैहत मुखमंत्री उमर अब्दुल्ला होरें अज्ज जम्मू-कश्मीर सैलसफा सरबन्धी विकास कारपोरेशन दे बोर्ड ऑफ डायरेक्टर्स दी बैठक लाई। इस दौरान कारपोरेशन दी कारकरदगी ते केंद्र शासित प्रदेश च सैलसफा सरबन्धी ढांचे ते खातर तबज्जो सरबन्धी सेवाएं च विस्तार दे तौर-तरीकें पर चर्चा होई। इस दौरान ध्यान JKTDC गी होर बी मता बेहतर ते सैलानिएं दे अनुकूल बनाने पर दित्ता गेआ। मुखमंत्री होरें नमिएं काडुं, बेहतर सेवाएं ते स्थूलतें पर ध्यान देने लेई जोर पाया तां जे मते थवां मते सैलानिएं गी आकर्षित कीता जाई सकै ते जम्मू-कश्मीर सैलसफा विकास कारपोरेशन गी सैलसफा सैक्टर च इक बेहतररीन कारपोरेशन दे तौरा पर कायम कीता जाई सकै।

<><><><><><>

### Gujrat-Bridge Collapse

गुजरात दे बडोदरा जिले दे पादरा इलाके च अज्ज बडुलै इक पुल दे ढेई जाने आहली घटना च 9 लोकें दी मौत होई गेई ते केई होर घायल होई गे। आनंद ते बडोदरा गी जोड़ने आहले गंभीरा पुलै दा इक हिस्सा ढुट्टी गेआ जेदे करी 5 गड्डियां महासागर नदी च जाई पेइयां। बडोदरा दे एस.पी रोहन आनंद हारें इस हादसे दी पुष्टि कीती ऐ। उनें मकामी प्रशासन ते बडोदरा जिला प्रशासन गी फौरी तौर पर बडु पैमाने पर बचा कम्म शुरू करने आस्तै सूचित कीता।

<><><><><><>

### Gujrat-CM

गुजरात दे मुखमंत्री भूपेंद्र यादव होरें गुजरात दे बडोदरा च पुलै दे ढेई पौने आहली घटना दे जांच दे हुक्म जारी कीते न। अज्ज गांधीनगर च मुखमंत्री हुंदी अध्यक्षता च होई दी कैबिनेट टी मीटिंग च इस मुद्दे पर चर्चा कीती गेई। श्री पटेल होरें अधिकारियें थमां पुलै दे ढेई पौने सरबन्धी शुरूआती रिपोर्ट मंगी ऐ। कैबिनेट दी मीटिंग मगरा मुखमंत्री होरें शिड़क ते निर्माण मैहकमे दे अधिकारियें कन्नै बी गल्लबात कीती जेदे च राज्य दे दुएं माड़ी हालतें आहले पुलें बारै रिपोर्ट देने गी आखेआ गेआ।

<><><><><><>

### PM-Exgration

प्रधानमंत्री नरेंद्र मोदी होरें गुसरात दे बडोदरा जिले च पुलै दे ढेई पौने करी होए दे जानी नुकसान पर डूंगा बसोस प्रगट कीता ऐ। उनें अपने ग गोआने आहले परोआरें कन्नै संवेदना प्रगट कीती ते सब्बनें घायलें दे तौले नरोए जोने दी कामना कीती। प्रधानमंत्री होरें प्रधानमंत्री राश्ट्री राहत कोष चा मृतकें दे परोआर आहलें गी 2-2 लक्ख रपे देने ते घायलें गी 50-50 जहार रपे देने दी घोशणा कीती।

<><><><><><>

## Pak-Human Rights

मनुक्ख अधिकारें सरबंधी संगठनें इस्लामाबाद टोल प्लाजा थमां पाकिस्तानी सुरक्षा बलें आसेआ बलूच विद्यार्थी सईद उबैदुल्लाह गी जबरदस्ती अगवाह कीते जाने दी सख्त निंदेआ कीती ऐ। बलूचिस्तान दे पजंगुर इलाके दे बसनीक ते कायदे आजम युनिवर्सिटी च पढने आहला उबैदुल्लाह, जबरदस्ती गैब कीते गेदे कई पीड़ित बचूलिएं चा इक ऐ। मनुक्खी अधिकारें सरबंधी संगठनें इसी लोकें दे बुनियादी अधिकारें दी खलाफवर्जी करार दित्ता ऐ। शांतिपूर्ण विरोध प्रदर्शन दे बाद बी कई लोकें गी अजें बी जेलें च डक्की रक्खेआ गेदा ऐ जिसले जे केइए गी इयां गै हिरासतै च लेदा ऐ।

<><><><><><>

## Texas-Florida

अमरीका दे टैक्सास च आए दे जबरदस्त हाड़ें च घट्टोघट्ट 109 लोकें दी मौत होई गई ऐ ते 160 कोला मते अजें बी लापता न। हाड़ करी सब्भनें शा मता प्रभावित ग्वादा लूप दरेआ च बचाव ते तुपाई अभियान जारी ऐ। टैक्सास दे गवर्नर ग्रेग एबाट होरें जानकारी दित्ती ऐ जे हाड़ औने दे बाद 161 लोकें दा अजें तोड़ी कोई अता-पता नेई ऐ जिसले जे तुपाई ते बचाव अभियान युद्ध स्तरै पर जारी ऐ। उनें मेद प्रगट कीती ऐ जे लापता लोक जींदा होंगन ते उनेंगी तौले बचाई लैता जाग।

<><><><><><>

## Rana-Judicial Custody Extend

दिल्ली दी इक अदालतै 26-11 आहले मुम्बई आतंकी हमले दे मुख्ख साजिशकर्ता तहव्वुर राणा दी न्यायिक हिरासत गी 13 अगस्त तोड़ी बधाई दित्ता ऐ। एह कार्रवाई राश्ट्री जांच एजेंसी एनआईए आसेआ राणा दे खलाफ इक पूरक आरोप पत्र दाखल करने दे बाद कीती गई ऐ। इस चार्जशीट च राणा दी गिरफ्तारी दा मीमो, सीजर मीमो ते किश होर दस्तावेज बी शामिल न।

<><><><><><>

## IMD-Weather

भारती मौसम विभाग नै अज्ज छत्तीसगढ़ ते मध्य प्रदेश च बरखा आस्तै रेड अलर्ट जारी कीता ऐ। आकाशवाणी समाचार कन्नै खास गल्लबात च मौसम विभाग दे सीनियर वैज्ञानिक डॉ. आर.के जेनामणि होरें दस्सेआ जे मध्य भारत च अगले 2 दिनें च लगातार बरखा पौने दी मेद ऐ। विभाग नै उत्तर भारत आस्ते बी अगले 2 दिनें आस्तै बरखा बरने दा ओरेंज अलर्ट जारी कीता ऐ। उनें जोड़ेआ जे दिल्ली एनसीआर च हल्की थमां दरम्याना बरखा बरने दी मेद ऐ।

<><><><><><>